

太上洞玄靈寶本行宿緣經

仙公請問太極真人高上法師曰 人根本行何修 而見世受福  
家門端正 子孫昌熾 與善因緣 世世不絕 死上生天堂 下生人  
間侯王之家 聰明儒仁 敬信經教 愛樂山林 常誦微言 終得仙  
道

法師答言 善哉 子之問也 夫人生各有本行宿緣命根 種種  
相因 願願相隨 以類相從 展轉相生 禍福相引 是以世世不絕  
玩好不同 用心各異 皆由先願也 欲修道結緣賢聖 當奉行大  
誠 廣建福田 弘施功德也 或致飛仙 或致天仙 或致地仙 或  
致命過生天堂 或致為鬼神 或致為六天大魔王官屬 或致命過逕  
生侯王家 人中之尊 或為一切所仰賴 富有天下 或致才智聰明  
或致姿容端偉 華炁清香 或致仁愛忠孝 貞潔簡素 或致善屬  
文翰 動靜可以取則 或致威嚴震肅 眾人所歎 或致篤好三寶  
供養彌勤 或致愛樂山水 清靜玩經 燒香齋戒 或致禮拜玄宗  
或致轉女為男 華容秀穎 或致家門肅清 世世因緣 順其本願  
善賢才者 為我子孫 安貴無極 或致見世受福 命終受報 或致

太上洞玄靈寶本行宿緣經

清微藏書閣

後生獲慶 得我宿功也 夫道何謂哉 以無心而應 眾生四輩修福  
德 要當有本願 福之報也 皆緣子于時立願耳 功德既設 志願  
亦定 其報廣 乃猶暮以待旦矣 世間民人偽薄 不信法言 各稱  
鬼黠 自用其意 輕忽宿命 以為妄造 非笑至經 以為虛誕 而  
厚積嗜欲 坐施立待報 望速而應悠 遂令玄教遲昧 世道交喪  
天人塗炭 皆由其身立行致之 太上所以痛心矣  
仙公曰 宿命因緣 生死報應 聞之矣 當何以為本行上誠乎  
答言 太上智慧上誠 百八十誠 皆上誠律也 能奉太上十  
誠 亦得此福也 今當為子說之 豈不願奉之乎  
仙公避席稽首曰 唯唯 天尊願便傳之矣 我即奉之焉  
法師曰 十誠者

- 一者不得嫉妒勝己 抑絕賢明
- 二者不得飲酒食肉 穢亂三宮
- 三者不得淫犯他妻女 好貪細滑
- 四者不得棄薄老病窮賤之人
- 五者不得誹謗善人 毀攻同學

六者不得貪積財寶 不肯施散  
七者不得殺生 祠祀六天鬼神  
八者不得臆論經典 以為虛誕  
九者不得背師恩愛 欺詐新學  
十者平等一心 仁孝一切  
能奉此十誠 分明立願 無不必報也 夫人見世行惡而不報者 是其先世餘福未盡 福盡而禍至 見世行善而不報者 是其先世餘殃未盡 殃盡而福至 或後生受報 不必在今世也 人能見世大建善功 必以功過相補 乃可免先世殃對 施恩望報則不報 陰陽必然矣 欲入仙道者 功加塵沙之比 其可為合也 十惡不可犯

一者飲酒淫色 貪欲無已  
二者陰賊世間 訛謗道士  
三者輕師慢法 傲忽三寶  
四者竊取經書 妄宣道要  
五者借換不還 欺誘萬民  
六者殺生貪味 口是心非

## 太上洞玄靈寶本行宿緣經

清微藏書閣

七者背恩違義 犯諸禁戒  
八者誦經忽略 噴嗔自是  
九者責望人意 嗔恚四輩  
十者臆斷經旨 損益聖典  
不信宿命 快情所為 穢慢四大 不念生道 是為十惡之戒  
犯之者 或見為鬼神所枉殺 陽官所考治 居安即危 履善遇惡  
可事不偶 或死入地獄 幽閉重檻 不覩三光 晝夜拷毒 抱銅柱  
履刀山 攀劍樹 入鑊湯 吞火煙 臨寒冰 五苦備經 地獄既  
竟 乃補三官徒役 謫作山海 鞭笞無數 既竟 當下生於世 常  
為下賤人 或作僕使 有人之形 無人之情 或生邊夷異國 或生  
業疾 惡惡相緣 善善相因 其罪福難說 罪福之報 如日月之垂  
光 大海之朝宗 必至之期 萬無一失也 罪福之不滅 若影之隨  
形 輪轉之對 若車之輪矣

太極真人於是作奉誠頌曰

道以無心宗 一切作福田 立功無定主 本願各由人  
虛己應眾生 注心莫不均 大聖宏至教 亦由雨隆天

高陵靡不周 常卑固成淵 海為百川王 是能舍龍鱗  
萬劫保制用 豈但在厥年 奉戒不暫停 世世善結緣  
精思念大乘 會當體道真

大極真人乃復作違誠頌曰

人根由本願 願定剋大患 淨想奉十誠 故能超八難  
前生犯玄教 今生那得安 愚瞽忽性命 罪至乃長歎  
對來如影響 視之令心寒 生值處下賤 慘戚無暫歡

仙公敢問 齋之深淺 功德高卑 眾惡十善輪轉 運周無停  
德深功成 入寂定虛 階級緣何

法師答言 夫一切云云 皆當空盡 有無相陶 修德養神 積  
功凝真 真身乃空 出入有無 隱寂極妙 保景希微 濟度一切  
為眾法橋 輪轉學道 莫先乎齋 齋者 莫過靈寶 其法高妙 不  
可宣於世凡流之人 常傳諸有宿世功德之子 自無前生重緣 不令  
見之 遇見亦不好 皆有本願而然也 故不可強訓矣 萬劫以來  
仙聖口訣相傳 祕而不書 吾被太上命令 授仙公之子 善書之焉  
此法饒益一切求道之士也 雖劫數運周 是經不易矣 道與世隆

## 太上洞玄靈寶本行宿緣經

清微藏書閣

德隨化興 聖人難值 道亦難見 經亦難聞 聖世難遭 賢人難  
遇也 故非有善功之人 不得預斯會矣 昔正一真人學道時 受靈  
寶齋 道成後 謂此齋尊重 乃撰 靈寶五稱文 中出齋法 為  
旨教經 大同小異 亦次本經齋法也 太乙齋法 於此大齋玄之玄  
矣 教初學小乘之階級耳 宗三洞玄經 謂之大乘之士 先度人  
後度身 坐起臥息 常慈心一切 皆念經營之無有怠倦 德並太上  
道超虛皇 恩滿十方 齊契玄真 攜提諸天 願極道原  
夫學道常淨潔衣服 別靖燒香 安高香 座盛經 禮拜精思  
存真吐納導養 悔謝七世父母 及今世前世重罪惡緣 布施立功  
長齋幽靜 定其本願 當令心虛意玄 然後真道可成也 善備巾褐  
單裙 讀經被衣服法制 則不得妄借人 著不淨處 名曰法服 法  
服恒有三神童侍之 昔有賢者 迎一道士 道士不得即往 以披褐  
赴之 行至家 其人敬信燒香 禮之如見道士 神童見形云 道士  
使我來 主人于時不知是神童 主人病即除愈 家門無恙 神童語  
主人曰 病者已愈 道士無煩復來 賢者可送法服 還道士也 主  
人如其語送至 道士訊問 答曰 一日疾苦 奉請先生齋 先生多

事但遣仙童不見顧齋病人今已愈奉送法服道士愕然駭聽  
言畢答曰貧道一日整頓法事竟往主人許賢者去亦不更  
來貧道是以不去非為負信亦無人可遣又不知君家病愈此  
乃當由主人心盡所致問往人形貌何似主人答言年可十五六  
姿容端正似書生人也道士思唯我弟子都無此人恐神人降耳  
故法服當必令淨潔制作得法不爾鬼反害人威禁俱如明科也  
若朽敗當自衣之不得他用也

仙公曰始聞法服之威神矣請問十誠可得便奉耶

真人答言我昔受之太上大道君吾奉行世世與善結緣當  
在福中致得仙道今以傳子念宗之焉昔有凡人奉持此戒念  
道不虧延壽益筭家門隆盛願念後生大學聰明經典終入仙  
道滅度之日徑昇福堂衣食自然歡樂適意後下生於世乃  
學大道經聰明洞達為世法師無不曉了復有凡人大作功德齋  
誠然燈供養三寶翹勤不息願生侯王之家得為貴人形容端  
偉命過之日飛天迎之徑昇天堂衣食自然歡樂無為後下  
生諸侯王家為貴人之子聰明智慧姿容端正華炁清香復有

## 太上洞玄靈寶本行宿緣經

清微藏書閣

貴人居政以道善作功德齋誠施惠然燈悔罪解七世父母宿對  
緣結供養三寶願我後生世為貴人展轉福緣姿容艷悅才識  
洞達恒值賢明供養三寶命過之日飛天迎之徑上福堂快  
樂不可言後即生國王之家富貴倍先識度秀穎清高遠邁民  
豐家安復有貴人行是功德願念後生終入仙道其後世果好道受  
經無文不覽即得昇仙白日飛行復有凡人行是功德願我後  
生常見三洞大經後生便見大經受而誦之三界所敬復有凡人  
行是功德願為上學道士大博至經後生便為道士大學至經  
為眾法師復有凡人行是功德願我後生入山學道後生乃山棲巖  
側精思念道復有女人行是功德願轉身為男後生即為男子  
復有賢人行是功德助法師治經願我後生得遇經道仍如所願  
復有賢人行是功德誦經齋誠供養三寶一心念道願報七世父  
母因緣之恩上生天堂反胎人間侯王之家我身昇仙長寂無為  
吾歷觀施惠修道者所求莫有不得要須本願願定無不報也  
其報喻如影響之應四時之節矣但罪福不俱報其相差次功  
過推移或在來生或在見世罪福由人本行所習蓋非道德之悠

誕也 而人民皆欲交報為有驗 推移後世 謂之無靈 愚夫因茲快  
情極慾 輕忽天網 而遭遇八難 履觸十苦 當斯之時 莫曉所由  
不亦悲哉 不亦悲哉 人身假借暫會耳 因炁而生 炁散人死  
神真各去 身亦分離 變蟲而食之灰土 為一切鬼 受苦毒 殊於  
生時 豈不哀哉 豈不哀哉 惟得道體 真身常安全 得道之由  
積德行善 輪身鍊神 故致成真身焉 復有凡人見道士靜齋然燈  
燒香禮拜 旋行濟濟 便發道心 欲供養三寶 其人家窮 無他珍  
餚 以數莖菜勸助中食 是時心念 使我後世富有 得大供養三寶  
廣施福田 既見世安穩 壽極天命 命終之日 當入地獄受對之  
時 太上有教 其人先雖有少罪 而翹勤精進 功以補過 便令昇  
福堂 後生貴家 世世公子 福祿自然 好樂道德 供養三寶 才  
識淵遠 復有一人 見真人道士齋靜讀經 乃笑曰 彼向空吟空經  
將欲何所希耶 虛腹日中一食 此罪人耳 道士乃慈心喻之 故  
執意不釋 其人後死 徑入地獄拷毒 五苦備致 獄吏責辭 列言  
生時非笑道士 毀辱三寶 今被此對 後生方為下賤貧陋之民 復  
有一人 姿容端正 亦外學世經 會見道書 經義妙遠 乃曰 此

## 太上洞玄靈寶本行宿緣經

清微藏書閣

似古人虛妄之談耳 吾求解道士及賢貴 耽玩之終日 將欲何求乎  
其人即見世為惡鬼所殺 強天天命也 死入地獄 諸苦備受 後  
生頑癡 不在人倫 復有道士輕法妄宣 泄慢寶經 見世為考鬼所  
殺 幽沈地獄 後生業疾 其苦難說 是故經文不可不秘之 恐有  
不能寶用 使彼此得罪 又為人師 甚亦不易 授弟子不善 罪皆  
相及 人心難測 莫不慳貪 故聖人遺法 以法信效之 聖聖相傳  
不言須信 愚愚相授 則非信不盡 子豈不可慎之  
夫學道 當先忠孝 善行持誠 慈心一切 事師恭肅 吐納養  
神 尊受大經 禮仰法師 如奉聖人 齋靜誦經 施惠困厄 勸人  
以善 然後服藥致益 吐納神和 齋誠有感 誦經真降 魔眾伏使  
敢為試害 如此必得道 道德上下經 及洞真 洞玄經 三皇天  
文 上清眾篇詠等 皆是太上虛皇眾真 十方自然真仙 及帝君之  
隱位 及諸天大聖眾諸天宮殿城臺 山海立池 或是太上之靈觀  
自然之寶闕 並諸天之日月星辰 城郭及門戶之銘 或是大魔王官  
屬之內諱密字 宮室之處所 太上故撰而為文也 是以不可毀謗妄  
宣矣 若齋靜禮預 於玄上注心道真 而誦經數句者 則所言華華

而響對

是時 太上玉京玄都 八方諸天 三千大千世界 眾聖真人亦  
來到 玉京山東方無極諸天安大堂鄉大千納善之世界眾聖 玉京山  
東南無極諸天元福田大千用賢之世界眾聖 玉京山南方無極諸天宛  
黎城境大乘棄賢之世界眾聖 玉京山西南無極諸天延福鄉大千仁靜  
之世界眾聖 玉京山西方無極諸天福堂州大千靜行之世界眾聖 玉  
京山西北無極諸天福德之野大千延賢之世界眾聖 玉京山北方無極  
諸天鬱單之野大千清靜之世界眾聖 玉京山東北方無極諸天福集都  
大千長安之世界眾聖 蓋太上玉京山虛無玄都 無極八方諸天諸地  
世界大聖真人位號 亦悉在其中矣

經語與世書語柑似者 此非世流俗之常辭也 皆敷演玄真 寂  
暢自然 披散太上蔚羅天尊 理蹟希微 滌滯清神 住年回劫 遂  
成昇仙 長存無極 七祖生天堂 是經高妙 故曰玄之又玄 子其  
勗哉 道之至淵 道體虛無 弘之由人  
言三寶者 道寶太上 經寶 師寶 是為三寶 三尊者 道尊  
太上 經尊 師尊 是為三尊也 人身中稱三尊 身中有三宮 太

# 太上洞玄靈寶本行宿緣經

清微藏書閣

一帝君 公子 無英 是為三一之尊 經言七祖父母 上生天堂  
解結散滯 或反胎人間侯王之家 我身昇仙 恒保福根者 是七世  
父母因緣之報 我身絕愛 斷割胞元 禮願之云 七世父母 上生  
天堂 下生人中侯王之家 此大孝之道 洞經之旨矣 至人之鍊形  
過於太陰 政十月耳 亦復須頃之間 隱寂胞胎 夫處胞胎之時  
亦未為陋矣 人在胎中 皆憶宿命之事 既生頓而忘之 惟得道  
洞真 自然知之 所以語世人者 欲使其修善行 為來世作津梁耳  
夫言仙者 遷也 自凡至聖之漸也 真者 堅也 更無敗壞也  
從仙修之 以成真人 故仙人有階級 真人有品次矣 六天為三  
界 大魔王領六天鬼神之事 魔王承奉太上眾真天尊上人也 道士  
功成 魔王即保舉焉 當成之時 魔喜試之 神正之與不正也 道  
士魔王上官 其尊太上經 故以魔王位主鬼神 皆其先世積福所致  
耳 眾聖亦然

夫學道宜知先師 我師是太上玉晨大道虛皇 道之至尊也 我  
是師第六弟子 大聖眾皆師之弟子 弟子無鞅數也 我師名波悅宗  
字維那訶 今以告子 子祕之哉 蓋真人之名字 亦難究矣 此

名字多是隱語也 我名徐來勒 字洪元甫 夫學道不存師 齋誦無感 若妄宣不信之人 則得罪於三官 地獄三界六天北帝大魔王之下治 在大北海 天地之北方 羅酆之山 高二千六百里 周旋三萬里 內外皆七寶宮室 亦盛都也 天下鬼神之所宗處 今以此天宮名號相示 人能咒誦之者 惡鬼不敢近 妖邪伏滅 禍害不侵 魂精澄正 神精澄正 神炁常存也 我師告曰 吾學道修齋讀經 立功濟物 事師恭勤 彌劫歷年 或生王家 或生公門 或生賤人 或生諸天 或生魔王 或還墮地獄 徒作三官 經履十苦八難 而執志不虧 轉輪求道 常為世人所笑 亦不與言 默自勗勵 秉操日固 行業愈新 每事依經 初不敢疑惑 真值聖文 遂得上仙 身如金剛 體真入妙 希微洞質 永享無量之壽也 此故由吾專密 柔仁慈愛 受經不倦故耳 非自然得道也 夫道仕之於家學者 當建精舍清靜齋 及施高座 盛經並讀誦 存思床方五尺 其高亦然 常燒香 然燈不輟 非同學者不令入也 法服又不得妄借人 經皆當師授 校定本文 盛其事 欣欣常如對太上也 勿得傲慢交笑 論及流俗榮利之務 若犯此者 侍經

## 太上洞玄靈寶本行宿緣經

清微藏書閣

仙童即奏入於三天司直 三天司直上奏太上 三奏太上 子必失經也 鬼神亂考 恐不得以壽死 將何仙之有哉 經不從師受 則無神炁 修之不行 侍經仙童恒司考人 殃及七世父母 受道不敬存師 則三官紀錄 鬼必橫害 人受經穢慢 不清靜者 則見被誹謗之罪 死後入地獄 竟當生六畜中 經垮 不以香湯洗沐 則魂魄奔落 為他鬼所拘錄 受經未應宣傳 便擅宣泄者 則七祖囚於地獄 身履三惡之考 雖合傳 非其人者 罪同此科 道士欲山居幽處 宜先受經 恭肅事師 修諸善功 以伏山神 山無大小 皆有神靈 山大則神大 山小則神小 山神壞人 亦不立也 人不解至法 不知修善立功 此何以能久山棲乎 水亦有神 八海則有神王居焉 江湖河濟 皆有神也 又龍王鬼神治其清淵矣 河伯水官 各有宮殿府寺 亦七寶銅瑒 皆類酆都之中 悉為諸仙人之下宮也 並由人生時而學 行業深淺 功德大小 計品受今之報也 後世當更生人道 隨其所行而報之 萬無一失 天地水三官 書人功過善惡之事 未有不備矣 昔有貴人 善信道教 供養三寶 治寫經書 建立靖舍 當成之時 而貴人病篤 弟子親

迎 醫藥欲加苦治 貴人曰 吾少來敬順科誡 敢慙忘之 亦布施  
貧乏 供養三寶 建諸靜舍 太上豈不知之 人生有死 死非所辭  
今所以恨者 恨未得親持齋誡讀經 然燈行道 禮謝七世之愆痾  
耳 為我來生作橋梁者也 我病之困 將以命盡壽終 醫藥可救狂  
癘耳 當如我命何哉  
爾時 太上遙觀十方善惡之人 即敕司命延此人壽三十年 於  
是豁然而愈 身康便如未病之時 曩尚將展 精進日新 修齋持誡  
奉行眾善 供養三寶 致世世富貴 善人來生其家 轉輪得道  
是人今為太上東華仙王也 積善之教民 豈不然哉 豈不然哉

太上洞玄靈寶本行宿緣經竟

天運辛卯年子月正一天師清微弟子洪鼎堅率門人

羅大英 安羅飛恭錄彙編

## 太上洞玄靈寶本行宿緣經

清微藏書閣